

四庫全書

史部

欽定四庫全書

史部

嶺外代答卷一至

三

詳校官鴻臚寺少卿臣梁鼎陽

編修臣程嘉謨覆勘

謄錄監生臣范翔集

謄錄貢生臣苗序瀛

欽定四庫全書

史部十一

嶺外代答

地理類八雜記之屬

提要

臣等謹案嶺外代答十卷宋周去非撰去非字直夫永嘉人隆興癸未進士淳熙中官桂林通判是書即作於桂林代歸之後自序謂本范成大桂海虞衡志而益以耳目所見聞錄存二百九十四條蓋因有問嶺外事者倦

於應酬書此示之故曰代答原本分二十門
今有標題者凡十九門一門存其子目而佚
其總綱所言則軍制戶籍之事也其書條分
縷晰視嵇含劉恂段公路諸書敘述為詳所
紀西南諸夷多據當時譯者之詞音字未免
舛訛而邊帥法制財計諸門實足補正史所
未備不但紀土風物產徒為談助已也書錄
解題及宋史藝文志並作十卷永樂大典所

載併為二卷蓋非其舊今從原目仍析為十
卷云乾隆四十六年九月恭校上

總纂官

臣紀昀臣陸錫熊臣孫士毅

總校官臣陸費墀

欽定四庫全書

嶺外代答目錄

卷一

地里

邊帥

卷二

外國上

卷三

外國下

一門原
脫標題

嶺外代答

卷四

風土

法制

卷五

財計

卷六

器用

服用

食用

卷七

香

樂器

寶貨

金石

卷八

花木

卷九

禽獸

卷十

蟲魚

古跡

蠻俗

志異

嶺外代答原序

入國問俗禮也矧嘗仕焉而不能舉其要廣右二十五
郡俗多夷風而疆以戎索海北郡二十有一其列于西
南方者蜿蜒若長蛇實與夷中六詔安南為境海之南
郡又內包黎獠遠接黃支之外僕試尉桂林分教寧越
蓋長邊首尾之邦疆場之事經國之具荒忽誕漫之俗
瑰詭譎怪之產耳目所治與得諸學士大夫之緒談者
亦云廣矣蓋嘗隨事筆記得四百餘條秩滿束擔東歸

邂逅與他書棄遺置勿復稱也迺親故相勞苦問以絕域事驟莫知所對者蓋數數然至觸事而談或能舉其一二事類多而臆得者浸廣晚得范石湖挂海虞衡志又於藥裏得所抄名數因次序之凡二百九十四條應酬倦矣有復僕問用以代答雖然異時訓方氏其將有考於斯淳熙戊戌冬十月五日永嘉周去非直夫記

欽定四庫全書

嶺外代答卷一

宋 周去非 撰

地理門

百粵故地

自秦皇帝并天下伐山通道略定揚粵為南海桂林象
郡今之西廣秦桂林是也東廣南海也交趾象郡也漢
武帝平南海離秦桂林為二郡曰鬱林蒼梧離象郡為
三曰交趾九真日南又稍割南海象郡之餘壤為合浦

郡乃自徐聞渡海略取海南為朱崖儋耳二郡置刺史
于交州漢分九郡視秦若多其統之則一交州刺史耳
至吳始分為二於是交廣之名立焉時交治龍編廣治
番禺唐太宗分天下為十道合交廣為一置採訪使于
番禺其規模猶漢時唯帥府易地也高宗始置安南都
護府于交州本朝皇祐中置安撫經略使于桂州西道
帥府始於此至今八桂番禺龍編鼎峙而立復秦之故
云

並邊

廣西西南一方皆迫化外令甲邕宜欽廉融瓊州吉陽
萬安昌化軍靜江府係沿邊柳賓貴橫鬱林化雷係次
邊總廣西二十五州而邊州十七靜江屬縣半抵徭峒
徭峒者五陵蠻之別也自靜江稍西南曰融州其境控
扼王江樂善宜良丈盈洪源從允牂牁夜郎諸蠻自融
稍西南曰宜州宜處羣蠻之腹有南丹州安化三州一
鎮荔波羸河五峒茅灘撫水諸蠻南丹者所謂莫大王

者也自宜稍西南曰邕州邕境極廣管溪峒羈縻州縣
峒數十右江直西南其外則南詔也左江直正南其外
則安南也自邕稍東南曰欽州欽之西南接境交趾陸
則限以七峒水則舟楫日通自欽稍東曰廉州廉之海
直通交趾自廉東南渡海曰瓊州萬安昌化吉陽軍中
有黎母山環山有熟黎生黎若夫浮海而南近則占城
諸蕃遠則接于六合之外矣

廣西省併州

廣西地帶蠻夷山川曠遠人物稀少事力微薄一郡不當浙郡一縣異時偏方割據境土褊小故並建荒為州縣而務觀美逮夫正統有歸六合混一乃省併晏州荔州今靜江府荔浦縣是也龍州今柳州龍城縣是也蘆州今藤州鍾津縣是也皆廢於唐之貞觀溥州今靜江府興安縣也廢於本朝之乾德嚴州今象州之來賓縣也澄州今賓州上林縣也蠻州今橫州永淳縣也牢州黨州今鬱林州南流縣也南儀州今藤州岑溪縣也繡

州今容州普寧縣也禺州北流縣也順州陸川縣也潘
州今高州茂名縣也南亭州玉州今欽州靈山縣也姜
州今廉州合浦縣也皆廢於開寶珠州今融州融水縣
也鎮寧州今宜州帶溪寨也賓州今高州信宜縣也蒙
州今昭州立山縣也皆廢於熙寧龔州今潯州平南縣
也平州今融州懷遠縣也白州今鬱林州博白縣也觀
州今宜州高峯寨也溪州馴州叙州今宜州北遐鎮思
立寨也皆廢於紹興夫州大矣廢而為縣若寨又不加

大焉又有不專縣寨者顧有廢二州而僅成一縣且或為鎮寨或廢一州而併入近縣者然則昔之為州無乃強名乎

五嶺

自秦世有五嶺之說皆指山名之考之乃入嶺之途五耳非必山也自福建之汀入廣東之循梅一也自江西之南安踰大庾入南雄二也自湖南之郴入連三也自道入廣西之賀四也自全入靜江五也乃若漳潮一路

非古入嶺之驛不當備五嶺之數桂林城北二里有一
坵高數尺植碑其上曰桂嶺及訪其實乃賀州實有桂
嶺縣正為入嶺之驛全桂之間皆是平陸初無所謂嶺
者正秦漢用師南越所由之道桂嶺當在臨賀而全桂
之間實五嶺之一途也

湖廣諸山

南方多佳山竊謂其本根自衡山來勢如木之有餘枝
條枚也東南一幹為廣東之韶石雲闕參天鍾簏踞地

望之使人肅然想有虞張樂之盛綿延至英州羣峯玉
立堅潤而秀乃其枝柯也散布為德慶之三洲巖惠之
羅浮山與其他不知名之奇山又其條枚也西南一幹
發為道之九嶷崢嶸峻極峯岫挺異縈紆盤礴惘不可
測綿延為桂林之山羣峯拔地森立四野亦皆其枝柯
也至伏地而行乎黃茅赤土之下突出為西融州之老
君洞天容之勾漏洞天潯之白石洞天茲亦其條枚也
東南方至陽天地之美具焉草木之生必向榮於南枝

衡山之陽亦猶是耳

桂山

山谷詩云桂嶺連城如鴈蕩平地蒼玉忽嵯峨唐人謂兩地不如陽朔好碧蓮峯裏住人家鴈山屢游矣桂山得鴈山之秀鴈山不若桂山之多若置諸大龍湫龍鼻泉之側則雄偉之氣亡矣桂山之高曾不及鴈山之半故無尊雄之勢謂可與相頡頏者過矣乃若陽朔諸山唯新林鋪左右十里內極可賞愛青山綠水團欒映帶

煙霏不斂空翠撲人面面相屬人住其間真住蓮花心也桂林負郭諸山頗不及耳夫其尖翠特立無不拔地而起綿延數百里望之不見首尾亦云盛哉

桂林巖洞

石湖嘗評桂山之奇宜為天下第一及攷唐韓退之詩云水作青羅帶山如碧玉簪柳子厚訾家洲記云桂州多靈山發地峭竪林立四野觀前人品題桂林之意端不誣矣山皆中空故峯下多佳巖洞神剎鬼刻高者憑

崖如化城下者穿隧若水府大者可建五丈旗小者猶可容十客或浮為洲渚或內通舟楫去城不過七八里近二三里几杖間可以徧覽巖穴有名可紀者三十餘所今述于後巖則曰讀書曰疊綵曰伏波曰龍隱曰劉仙曰屏風曰佛子曰雉巖洞則曰白龍曰華景曰水月曰龍隱曰棲霞曰元風曰曾公曰南潛曰北潛曰隱山六洞曰虛秀曰石乳峯則曰立魚曰獨秀其他不可枚數矣

按范成大桂海虞衡志所載巖洞與此同惟白龍乃洞名龍隱則巖洞俱有又有虛秀無靈秀此本

舊有錯悞
今俱改正

靈巖

洞穴有水然後稱奇桂林諸洞無慮百所率近在城外數里俱有可觀若水東之曾公巖興安之石乳洞皆有流水自洞而出施直橋橫檻其上遨遊者得以徙倚其間異於他洞者空明幽邃而已雖然未若城南之水月洞東江之龍隱巖也水月中通形如半規江流貫之中有石橋可以觴客龍隱修曲而高明江流貫之鼓棹而

入仰視洞頂天矯乎真龍之脊脅也范石湖謂二洞奇賞絕世融州老君洞亦通川流中有小洲其旁高峯有乳石滴成老君之形鬚眉衣冠無一不具張于湖榜曰天下第一真仙之洞以是知凡洞必以川流為貴也雖然二賢所賞水深數尺廣纔丈餘耳若夫桂之靈川縣有靈巖者二賢未知也是巖也大江洞其腹水闊二十丈深當倍之余嘗攝邑靈川天久不雨往禱于巖方舟造洞遙望大江平濶直抵山根橫有一線之光邇而望

之乃知洞穴表裏明徹而然也即其洞口水面貼貼正
將枕山不可得入者舟子擊水伏而進仰視洞頂與水
面相去纔丈餘水與洞頂皆平如掌舟入漸深楫聲隱
隱震動固已駭人心目人聲一發山水皆應大音叱咤
洞虛碧裂當巖之中洞頂穹窿如寶蓋然其下即神龍
所居也余斂板焚香巫者以修綆下瓶汲深奉之以歸
輒有感應是江也西通徭峒日寫良材貫巖而下水深
不可施篙撐拄巖頂而後得出余求之事實謂此江古

來遶出山外忽雷雨數日神龍穿破山腹以定窟宅遂
命曰靈巖縣曰靈川亦以是得名今洞旁山背尚有故
江跡存噫此巖水色沉碧雄深巖靜人至其間若有神
靈左右之者誠非遊觀之地去城三十里不若諸洞之
邇於人所以未蒙賞音惜哉

羅叢巖

羅叢巖在潯州西南六十里巖中明快可容數百人每
遇重九合鄰郡之人而集焉以為登高之樂巖內有三

聖殿殿側有石鐘其大合抱自然天成殿東則有碧虛洞由石穴而入通行平坦其屈曲約半里餘出于巖之東洞內則有石佛石磬石獅子石牀石鐘殿西則有靈源洞由石穴而入通行平坦其屈曲約一二里出于巖之西洞內則有石羅漢石象石馬石魚石筍石鼓凡遊兩洞者必秉火炬以觀聯巖之外西則有水月巖約深數丈約闊十五丈泉源清徹四時不涸中有異魚存焉巖口則有龍王殿入巖中則有觀音堂或遇歲旱里人

禱之甘雨必應由大巖之中皆用石板平砌而出巖門則有鐘樓樓之西倚巖則以石甃高數丈為方丈樓之外則有三門門之外則有超然亭亭之左右則有石板為路連袤一二里四圍皆植松竹實潯之勝槩云

黎母山

海南四州軍中有黎母山其山之水分流四郡熟黎所居半險半易生黎之處則已阻深然皆環黎母山居耳若黎母山巔數百里常在雲霧之上雖黎人亦不可至

也秋晴清澄或見尖翠浮空下積鴻濛其上之人壽考
逸樂不接人世入欲窮其高往往迷不知津而虎豹守
險無路可攀但見水泉甘美耳此豈蜀之菊花潭老人
村之類耶

廣西水經

凡廣西諸水無不自蠻夷中來靜江水曰灘水其源雖
自湘水來然湘本北行秦史祿決為支渠南注之融江
而融江實自瑤峒來漢武帝平南越發零陵下灘水蓋

汴湘而上沿支渠而下入融江而南也灘水自桂歷昭而至蒼梧融州之水牂牁江是也其源自西南夷中來武帝發夜郎下牂牁即出此也宜州之水自南丹州合集諸蠻溪谷而來東合于牂牁歷柳歷象而至潯邕州之水其源有二一為左江自交趾來一為右江自大理國戚楚府大槃水來江合于邕歷橫歷貴與牂牁合于潯而東行歷藤而與灘水合于蒼梧蒼梧者諸水之所會名曰三江口實南越之上流也水自是安行入于南

海矣

牂牁江

西融州城外江水即牂牁江之下流也江面頗闊昔嘗
有大水泛出蜀南州牌漢武平南越發夜郎下牂牁非
由融州則何自而至南越哉今靜江府桑江寨其水亦
合于融江之上流或云桑江亦牂牁音之訛也大抵融
州之西為蜀之南地本連接但隔於蠻獠不可通耳

靈渠

湘水之源本北出湖南融江本南入廣西其間地勢最高者靜江府之興安縣也昔始皇帝南戍五嶺史祿於湘源上流灘水一派鑿渠踰興安而南注于融以便於運餉蓋北水南流北舟踰嶺可以為難矣祿之鑿渠也於上流砂磧中疊石作鐔觚銳其前逆分湘水為兩依山築堤為溜渠巧激十里而至平陸遂鑿渠遶山曲凡行六十里乃至融江而俱南今桂水名灘者言離湘之一派而來也曰湘曰灘往往行人於此銷冤自鐔觚分

水入渠循堤而行二里許有洩水灘苟無此灘則春水
怒生勢能害堤而水不南以有灘殺水猛勢故堤不壞
而渠得以溜相餘水緩達于融可以為巧矣渠水逶迤
興安縣民田賴之深不數尺廣可二丈足泛千斛之舟
渠內置斗門三十有六每舟入一斗門則復閘之俟水
積而舟以漸進故能循崖而上建瓴而下以通南北之
舟楫嘗觀祿之遺跡竊嘆始皇之猜忍其餘威能罔水
行舟萬世之下乃賴之豈唯始皇祿亦人傑矣因名曰

靈渠

癸水

離水自癸方來直抵靜江府城東北角遂並城東而南
古記云賴有癸水遶東城永不見刀兵又有石記云湘
南南粵北此地居然自牛肋直饒四面血成池一騎刀
兵入不得五代靖康之亂大盜滿四方獨不至靜江風
水之說固有驗矣昔於城東北角溝離水遶城而西復
南東合于離厥後居民壅之溝遂廢范石湖帥桂乃浚

斯溝連漪如帶於溝口伏波巖之下八桂堂之前初為
危亭名以癸水此溝未廢桂人屢有登科既廢二十年
間幾類天荒石湖以淳熙甲午復溝乙未科果有蔣汝
霖戊戌科有蔣來叟辛丑科二人登科今石湖癸水亭
記但言癸水之為樂土福地耳復溝之效未續論也

龍門

潯象之間有龍門春水大至鱗鯉大魚自海逆流而上
漁師於龍門之下迴瀾之中設網橫江舉而得之有嘲

之者曰是殆南選之龍門也蒼梧上流亦有龍門灘其形勢甚可畏

象山

象州郡治西樓正面西山山腹忽起白雲狀如白象移時不滅然不可常見案秦象郡乃交趾非象州也今象州城門乃畫一白象不審何義然象州自昔不遭兵革凡有大盜皆相戒以不宜犯象皐然則城門之畫象豈謂此耶

天威遙

欽之士人曾果得唐人天威遙碑文義駢儷誠唐文也
碑旨言安南靜海軍地皆濱海海有三險巨石屹立鯨
波觸之晝夜震洶漕運之舟涉深海以避之少為風引
遵崖而行必瓦碎折三險之下而陸有川遙頑石梗斷
焉伏波嘗加功力迄不克就厥後守臣屢欲開鑿以便
漕運錐鑿一下火光煜然高駢節度安南齋戒禱祠將
施功焉一夕大雨震電于石所者累日人自分淪沒矣

既霽則頑石破碎水深丈餘旁有一石猶存未可通舟
駢又虔禱俄復大雨震電悉碎餘石遂成巨川自是舟
運無艱名之曰天威遙退而求諸傳載天威遙事略同
但不若是詳爾

天分遙

欽江南入海凡七十二折南人謂水一折為遙故有七
十二遙之名七十二遙中有水分為二川其一西南入
交趾海其一東南入瓊廉海名曰天分遙人云五州昔

與交趾定界于此言若天分然也今交趾於天分遙已
自占又於境界數百餘里吳婆竈之東以立界標而採
捕其下欽人舟楫少至焉

三合流

海南四郡之西南其大海曰交趾洋中有三合流波頭
潰湧而分流為三其一南流通道于諸蕃國之海也其
一北流廣東福建江浙之海也其一東流入于無際所
謂東大洋海也南舶往來必衝三流之中得風一息可

濟苟入險無風舟不可出必瓦解於三流之中傳聞東
大洋海有長砂石塘數萬里尾閭所洩淪入九幽昔嘗
有舶舟為大西風所引至于東大海尾閭之聲震洶無
地俄得大東風以免

象鼻砂

欽廉海中有砂磧長數百里在欽境烏雷廟前直入大
海形若象鼻故以得名是砂也隱在波中深不數尺海
舶遇之輒碎去岸數里其磧乃濶數丈以通風帆不然

欽殆不得而水運矣嘗聞之舶商曰自廣州而東其海
易行自廣州而西其海難行自欽廉而西則尤為難行
蓋福建兩浙濱海多港忽遇惡風則急投近港若廣西
海岸皆砂土無多港澳暴風卒起無所逃匿至於欽廉
之西南海多巨石尤為難行觀欽之象鼻其端倪已見
矣

天涯海角

欽州有天涯亭廉州有海角亭二郡蓋南轅窮途也欽

遠於廉則天涯之名甚於海角之可悲矣斯亭並城之東地勢頗高下臨大江可以觀覽昔余襄公守欽為直釣軒於亭之東偏即江濱之三石命曰釣石醉石卧石富為吟詠載在篇什

潮

江浙之潮自有定候欽廉則朔望大潮謂之先水日止一朝二弦小潮謂之子水頃刻竟落未嘗再長瓊海之潮半月東流半月西流潮之大小隨長短星初不係月

之盛衰豈不異哉

邊帥門

廣西經略安撫使

漢帥府在交州唐在廣州天寶中嶺南桂容邕交與廣
咸屬廣州採訪昭宗始陞桂管為節度本朝皇祐中儂
智高平詔狄青分廣西邕宜融為三路用武臣充知州
兼本路安撫都監而制經略安撫使于桂州選兩制以
上官為知州兼領使事於是八桂遂為西路雄府矣厥

後罷邕宜融為郡宜融州守臣兼本路兵馬都監邕守
兼本路安撫都監沿邊守臣並帶溪峒都巡檢使盡隸
于經略安撫使帥府既內兼西南數十州之重外鎮夷
蠻幾數百族事權不得不重矣廣西諸郡凡有邊事不
申憲漕唯申經略司此昔日陝西制也

瓊州兼廣西路安撫都監

漢武帝斬南越遣使自徐聞渡海略地置珠崖儋耳二
郡今雷州徐聞縣遞角場直對瓊管一帆濟海半日可

到即其所由之道也元帝時以海道閉絕棄之梁復置崖州隋時領縣十是時海南止一州耳唐貞觀五年置瓊州今瓊管靖海軍節度是也武德五年置儋州今昌化軍龍朔二年置萬安州今萬安軍武德五年置振州後改曰崖州今吉陽軍四州軍乃海上一洲耳中有黎母大山四州軍環處其四隅地方千里路如連環欲歷其地非一月不可遍瓊管再渡海至吉陽所謂再涉鯨波者也夫廣西去朝廷固遠矣海外州軍又加遠焉不

得不置小帥以臨之瓊守權能擢發四州軍官吏今兼本路安撫都監提轄海外逐州軍公事良以此也

邕州兼廣西路安撫都監

自唐分天下為十道二廣不分東西天寶中始置邕州經略使懿宗始陞邕管為西道節度使本朝皇祐中儂智高平詔狄青分廣邕宜融為三路守臣兼本路兵馬都監而置經略安撫使于桂州以統之今邕守兼本路安撫都監州為建武軍節度有左右兩江左江在其南

外抵安南國右江在西南外抵六詔諸蠻兩江之間管
羈縻州峒六十餘用為內地藩而內宿全將五千人以
鎮之凡安南國及六詔諸蠻有疆場之事必由邕以達
而經略安撫之諮詢邊事亦唯邕是賴朝廷南方馬政
專在邕邊方珍異多聚邕矣

宜州兼廣西路兵馬都監

廣西控扼夷蠻邕屯全將宜屯半將本朝皇祐間分宜
州為一路帥所統多夷州後罷為郡今守臣猶兼廣西

都監為慶遠軍節度宜之西境有南丹州安化三州一鎮又有撫水五峒龍河茅灘荔波等蠻及陸家砦其外有龍羅方石張五姓謂之淺蠻又有西南韋蕃及蘇綺羅坐夜回

按桂海虞衡志作面

計利流求謂之生蠻其外又有羅

殿毗那大蠻皆有徑路直抵宜城宜之境上舊有觀溪馴叙四州乃昔之邊也權力弱不足以為邊紹興四年罷為寨今宜有高峯帶溪北遐思立鎮寧五寨是也高峯一寨古之觀州正抵南丹其或犯邊高峯則其咽喉

宜之府庫月支南丹安化諸峒錢米鹽料有差

融州兼廣西路兵馬都監

大觀初置融州為黔南經略使所管皆夷州帥府地狹
割柳之柳城宜之天河桂之古縣以益之厥後罷融為
郡三縣復仍其舊至今黔南帥司官屬朱記在靜江府
軍資庫融州城下江即牂牁江也江之上流與王江合
王江之間羣猺居之又其上流羣蠻居之猺即五陵溪
之別也蠻則諸葛亮所征漢武帝所開者也在融則外

置列寨以備之融守兼廣西都監為清遠軍節度每歲聖節蠻酋赴宴頗多舊日帥府規模尚可觀矣

欽廉溪峒都巡檢使

欽廉皆號極邊去安南境不相遠異時安南舟楫多至後為溺舟乃更來欽今廉州不管溪峒猶帶溪峒職事者蓋為安南備爾廉之西欽也欽之西安南也交人之來率用小舟既出港遵崖而行不半里即入欽港正使至廉必越欽港亂流之際風濤多惡交人之至欽也自

其境永安州朝發暮到欽於港口置抵棹寨以誰何之
近境有木龍渡以節之沿海巡檢一司迎且送之此其
備諸海道者也若乃陸境則有七峒於如昔峒置戍以
固吾圉

欽定四庫全書

卷一

欽定四庫全書

嶺外代答卷二

宋 周去非 撰

外國門上

安南國

交趾本秦象郡漢唐分置已見於百粵故地首篇境內
偽置四府十三州三寨府曰都護大通清化富良州曰
永安永泰萬春豐道太平清化乂安遮風茶盧安豐蘇
州茂州諒州寨曰和寧大盤新安大抵清化遮風乂安

永安皆遵海而永安與欽州為境茶盧與占城為境蘇州茂州皆與邕管為境其國東西皆大海東有小江過海至欽廉西有陸路通白衣蠻南抵占城北抵邕管自欽西南舟行一日至其永安州由玉山大盤寨過永泰萬春即至其國都不過五日自邕州左江永平寨南行入其境机榔縣過烏皮桃花二小江至南定江亦名富良江凡四日至其國都乃郭達師所出也又自太平寨東南行過丹特羅江入其諒州六日至其國都若自右

江溫潤寨入其國則迂矣交人自謂至其國都曰入峒

謂吾民曰上京地里止此而文移動以數月蓋故為遷

延以示道里之遠國初其部內亂有丁都領

按宋史作部領

者

與其子璉率衆討平之衆立為帥三年而私命璉為節

度使開寶六年璉遣使貢方物制以璉特進檢校太師

充靜海軍節度觀察處置等使安南都護兼御史大夫

上柱國濟陰郡開國公仍賜推誠順化功臣八年又封

交趾郡王璉死黎桓

按原本作巨避欽宗諱今依宋史改正

篡立太平興

國中桓以交州叛朝廷因以撫之桓死子至忠立大中祥符三年至忠卒有子才十歲李公蘊冒姓黎殺之自稱留後遣使請命授以黎氏官公蘊死子德政立來告哀自稱留後天聖六年授安南都護交趾郡王寶元初進南平王德政死子日尊立自稱大越國李氏第三帝日尊死子乾德立自號明王乾德初立權移臣下大臣李上吉首建叛議而廣西白州進士徐伯祥者有功于州不得官導以犯邊臨邛欽廉三州朝廷遣郭達致討

幾覆其國乃以表乞降會王師大疫達受表班師時熙

寧八年也乾德死有遺腹子在占城奉而立之曰天祚

按宋史紹興二年乾德卒子陽煥嗣八年陽煥卒子天祚嗣此有誤

紹興二十六年入貢

乾道癸巳朝旨符廣西帥司下交趾買馴象天祚因乞
以象貢許之未入貢而天祚死嗣子龍翰不以聞而冒
天祚名稱貢封為安南國王既受封乃以天祚名乞國
印及上天祚遺表朝廷命廣西提刑廖遽為使至欽州
弔祭復立龍翰為安南國王其國僭偽自李日尊始偽

謚其祖曰太祖神武自號曰大越國僞年曰天貺繼以
十八字尊號乾德立乃犯邊朝廷遣郭達為招撫使趙
高副之進至滿定江乾德奉表請降納之初為法制雖
曰甚鄙而上下頗安之母妻皆稱后子皆稱太子本族
稱大王族長稱承嗣餘族稱支嗣其官有內外職內職
治國官之長曰輔國太尉猶宰相也外職治兵官之長
曰樞密使金吾太尉都領兵其文移至邊有判安南都
護府者亦外職也其入仕之途或任子或取士或以資

有御龍武勝等八軍皆在左右每軍二百人橫刺字於額曰天子兵又有雄略勇健等九軍以充給使其宮室有水精宮天元殿制皆僭擬別有一樓榜曰安南都護府屋其國最重科舉凡入貲先為吏叙遷至書狀又入貲為保義郎即可為知州矣凡蒞官不支俸唯付以一方之民俾得屬役耕漁以取利兵士月一更暇則耕種自給歲正月七日每一兵支錢三百紬絹布各一匹兵士月給禾十束元日以大禾飯魚鮓犒軍蓋其境土多

占禾故以大禾為元日之犒正月四日國王宴官僚七
月五日號大節人民相慶官僚以生口獻王王次日宴
酬之門前有樓置大鐘為民訴冤為盜者斫手足指背
國逃亡者斫手足謀叛者埋身露頭旁植勁竹挽竿繫
首以利刃剗之首歛起揭竿標矣欽州探海往其部永
安州投公文不容民間交語館之驛亭速遣出境防之
甚密其國入貢自昔由邕或欽入境蓋先遣使議定移
文經略司轉以上聞有旨許其來則專使上京不然則

否舊制安南使者班在高麗上建炎南渡李天祚乞入
貢朝廷嘉其誠優詔答之紹興二十六年乞入貢許之
乃遣使由欽入正使安南右武大夫李義嗣安南武翼
郎郭應以五象充常進綱外更進昇平綱以安南太平
州刺史李國為使所獻方物甚盛表章皆金字貢金器
凡一千二百餘兩以珠寶飾之者居半貢珍珠大者三
顆如茄子次六顆如波羅密核次二十四顆如挑核次
十七顆如李核次五十顆如棗核凡一百顆以金瓶盛

之貢沉香一千斤翠羽五十隻深黃盤龍段子八百五十匹御馬六匹鞍轡副之常進馬八匹馴象五頭二綱衙官各五十人使者頗以所進盛多自矜後乞入貢朝廷輒却之乾道九年朝旨符廣西下安南買馴象天祚因乞以象貢許之以五象進奉大禮正使安南承議郎李邦正副安南忠翊郎阮文獻又以十象賀登寶位安南中衛大夫尹子思為使自邕州右江永平寨入象綱所過州縣類有宴犒夫脚象屋之費而諸郡兵衛單弱

不足以聳外夷比至靜江見迓卒鎧甲之盛進退行伍
之肅使者失聲嘆曰吾至此方見大朝威儀參府之次
就戟門外上下馬庭參甚恭時范石湖為帥屬威嚴以
臨之而盛其犒宴饋遺視紹興二十六年禮遇頗殺使
者不敢較也帥司津遣入朝李邦正題詩郵亭有此去
優成賜國名之句比到闕偶得賜國之寵使者滿意而
歸過靜江復庭參致謝乞自欽州歸國許之比至欽留
兩月其國以舟楫旗幟迓之而歸是役也貢象之外附

貢金銀洗盤犀角象齒沉箋之屬計所直不滿二三萬緡似非紹興入貢之盛而其國掃府庫僅能集事朝廷賜予優厚復叨異恩交使衙官百人所過州縣批券得米以充糧食得錢則人日給十文餘皆藉歸國一路州縣應副夫脚八百人擎負貢物者固無幾而皆為使者負販至都象實能浮象奴所至水津索舟以載得錢然後驅以濟押伴官如加禮使者愈慢後不加禮乃聽命既僥倖賜國復有乞印之舉其後謝賜繼至欽又數乞

入貢莫之許矣其國人烏衣黑齒椎髻徒跣無貴賤皆然其酋平居亦然但珥金簪上黃衫下紫裙耳其餘平居上衣則上紫蟠領皂衫四裙如背子名曰四顛下衣則皂裙也或珥鐵簪或曳皮履手執鶴羽扇頭戴螺笠其文身如銅鼓款識其軍人橫刺字於額曰天子兵其婦人乃皙白異於男子皂裙男子之畫飾也以香膏沐髮如漆裹烏紗巾頂圓而小自額以上細褶如縫上徹於頂身着大蟠領皂衫加於小蟠領衫之上足加鞋襪遊

於衢路與吾人無異但其中可辨耳其來投文書也紫袍象笏趨拜雍容使者之來文武官皆紫袍紅鞵通犀帶無魚自貢象之後李邦正再使來欽乃加金魚甚長大其俗之輜如布囊而使者至欽則乘涼輜雨晴皆用之

海外黎蠻

海南有黎母山內為生黎去州縣遠不供賦役外為熟黎耕省地供賦役而各以所邇隸於四軍州黎賢直獮

悍不受欺觸本不為人患熟黎多湖廣福建之姦民也
狡悍禍賊外雖供賦于官而陰結生黎以侵省地邀掠
行旅居民官吏經由村峒多舍其家峒中有王二娘者
黎之首也夫之名不聞家饒於財善用其衆力能制服
羣黎朝廷賜封宜人瓊管有令於黎峒必下王宜人無
不帖然二娘死女亦能繼其業昔崇寧中王祖道經略
廣西撫定黎賊九百七峒結丁口六萬四千開通道路
一千二百餘里自以為漢唐以來所不臣之地皆入版

圖官僚皆受厚賞淳熙元年五指山生黎峒首王仲期率其旁八十峒丁口一千八百二十人歸化諸峒首王仲文等八十一人詣瓊管公參就顯應廟研石歃血約誓改過不復抄掠瓊管檄遣歸峒大抵黎俗多猜客來不遽見之而於隙間察客儼然不動然後遣奴出布席客即席坐移時主乃出見一交一談少焉置酒先以惡穢味嘗客客忍食不疑則喜繼以牛酒否則遣客其親故聚會推鼓舞三盃後請去備猶以弓刀置身側也

性好讐殺謂之作拘遇親戚之仇即械繫之要牛酒銀
瓶謂之贖命婚姻以折箭為信商旅在其家黎女有不
潔者父母反對鄰里誇之其親死殺牛以祭不哭不飯
唯食生牛肉其葬也舁櫬而行前一人以雞子擲地不
破即吉地也居處皆柵屋土產名香檳榔椰子小馬翠
羽黃蠟蘇木吉貝之屬四州軍征商以為歲計商賈多
販牛以易香黎裝推髻徒跣裸袒而腰繚吉貝首珥銀
釵或銅或錫首或以絳帛綵帛包髻或帶小花笠或加

雞尾而皆簪銀篦二枝亦有着短織花裙者熙寧中王
祖道撫定黎峒其首亦有補官今其孫尚服錦袍銀束
帶蓋其先世所受賜而服之云獠人執黎弓垂箭筈戴
兜鍪佩黎刀刀刃長二尺而柄甚長以白角片長尺許
如雞尾為靶之飾兜鍪織藤為之其婦人高髻綉面耳
帶銅環垂墜至肩衣裙皆吉貝五色爛然無有袴襦徒
繫裙數重裙製四圍合縫以足穿之而繫諸腰群浴于
川黎人半能漢語十百為群變服入州縣墟市人莫辨

焉日將晚或吹牛角為聲則紛紛聚會結隊而歸始知其為黎也

海外諸蕃國

諸蕃國大抵海為限界各因方隅而立國國有物宜各從都會以阜通正南諸國三佛齊其都會也東南諸國閩婆其都會也西南諸國浩乎不可窮近則占城真臘為宋裏諸國之都會遠則大秦為西天竺諸國之都會又其遠則麻離拔國為大食諸國之都會又其外則木

蘭皮國為極西諸國之都曾三佛齊之南南大洋海也
海中有嶼萬餘人莫居之愈南不可通矣閩婆之東東
大洋海也水勢漸低女人國在焉愈東則尾閭之所泄
非復人世稍東北向則高麗百濟耳西南海上諸國不
可勝計其大略亦可考姑以交趾定其方隅直交趾之
南則占城真臘佛羅安也交趾之西北則大理黑水吐
蕃也於是西有大海隔之是海也名曰細蘭細蘭海中
有一大洲名細蘭國渡之而西復有諸國其南為故臨

國其北為大秦國王舍城天竺國又其西有海曰東大食海渡之而西則大食諸國也大食之地甚廣其國甚多不可悉載又其西有海名西大食海渡之而西則木蘭皮諸國凡千餘更西則日之所入不得而聞也

占城國

占城漢林邑也境上有馬援銅柱在唐曰環王王所居曰占城以名其國地產名香犀象土皆白砂可耕之地絕少無羊豕蔬茹人採香為生國無市肆地廣人少多

買奴婢船舶以人為貨北抵交趾南抵真臘臣事交趾而日與真臘為仇乾道癸巳閩人有以西班到選得官吉陽軍都監者泛海之官飄至占城見其國與真臘乘象以戰無大勝負乃說王以騎戰之利教之弓弩騎射占城王大悅具舟送至吉陽厚賁隨以買馬得數十匹以戰則克次年復來人徒甚盛吉陽軍因却以無馬乃轉之瓊管瓊管不受遂怒而歸後不復至也異時諸國船舶類為其所虜蓋其俗本好剽掠其屬有賓瞳隴國

賓施陵國目連舍基在賓施陵或云即王舍城建隆二年曾貢方物三年八月又來貢哲宗元祐元年十二月又進貢有詔賜錢二十六百緡其慕化抑可嘉也

真臘國

真臘國遠於占城而近於諸蕃其旁有窠裏國西棚國三泊國麻蘭國登流眉國第辣撻國真臘為之都會北抵占城最產名香登流眉所產為絕奇諸蕃國香所不及也其國僧道呪法靈甚僧之黃衣者有室家紅衣者

寺居戒律精嚴道士以木葉為衣國中望天一隅常有少痕其人云昔女媧所不至也本朝徽宗宣和二年曾遣使入貢

蒲甘國

蒲甘國自大理國五程至其國自宋裏國六十程至之隔黑水淤泥河則西天諸國不可通矣蒲甘國王官負皆戴金冠狀如犀角有馬不鞍而騎王居以錫為瓦以金銀裹飾屋壁有寺數十所僧皆黃衣國王早朝其官

僚各持花獻王僧作梵語祝壽以花戴王首餘花歸寺
供佛徽宗崇寧五年二月曾入貢

三佛齊國

三佛齊國在南海之中諸蕃水道之要衝也東自闍婆
諸國西自大食故臨諸國無不由其境而入中國者國
無所產而人習戰攻服藥在身刃不能傷陸攻水戰奮
擊無前以故鄰國咸服焉蕃舶過境有不入其國者必
出師盡殺之以故其國富犀象珠璣香藥其俗縛排浮

水而居其屬有佛羅安國國主自三佛齊選差地亦產
香氣味腥烈較之下岸諸國此為差勝有聖佛三佛齊
國主再歲一往燒香藝祖開基建隆元年九月三佛齊
王悉利大霞里壇按宋史悉利下有胡字遣使來貢方物二年五
月復遣使進貢三年三月又來貢十二月又貢方物至
神宗元豐二年七月遣詹卑國使來貢哲宗元祐三年
閏十二月又遣使入貢五月復來貢慕義來庭與他國
不侔矣

閩婆國

閩婆國又名莆家龍在海東南勢下故曰下岸廣州自十一月十二月發舶順風連昏旦一月可到國王撮髻腦後人民剃頭留短髮好以花樣縵布繳身以椰子并撻樹漿為酒蔗糖其色紅白味極甘美以銷銀鋤錫雜鑄為錢其錢以六十箇准為一兩金用三十二錢為半兩金土產胡椒檀香丁香白荳蔻肉荳蔻沉香國人尚氣好鬪戰王及官豪有死者左右承奉人皆願隨死焚

則躍入火中棄骨於水亦蹈水溺死不悔

故臨國

故臨國與大食國相邇廣舶四十日到藍里住冬次年再發船約一月始達其國人黑色身纏白布鬚髮伸直露頭撮髻穿紅皮履如畫羅漢腳踏者好事弓箭遇閭戰敵時以綵纈纏髻國王身纏布出入以布作軟兜或乘象國人好奉事佛其國有大食國蕃客寄居甚多每洗浴畢用鬱金塗身欲象佛之金身也監覓國邇年販

象牛大食販馬前來此國貨賣國王事天尊牛殺之償
死中國舶商欲往大食必自故臨易小舟而往雖以一
月南風至之然往返經二年矣

注輦國

注輦國是西天南印度也欲往其國當自故臨國易舟
而行或云蒲甘國亦可往其國王冠有明珠異寶多與
西天諸國戰爭國有戰象六萬皆高七八尺戰時象背
立屋載勇士遠則用箭近則用槊戰勝者象亦賜號以

旌其功至有賜錦帳金槽者每日象亦朝王國王及官民皆撮髻繞白布以金銀為錢出指環腦子蓋貓兒睛之類也真珠象牙雜色琥珀色絲布妓女近萬家每日輪妓三千入朝祇役國人尚氣輕生有不相伏者日數十對在王前用短刀格鬪死而無悔父子兄弟不全釜而爨不共器而食然甚重義真宗大中祥符八年注輦國王遣使貢真珠等譯者道其言曰願以表遠人慕化之心至神宗熙寧十年六月此國亦貢方物上遣內侍

勞問之乃此國也

欽定四庫全書

嶺外代答卷三

宋 周去非 撰

外國門下

大秦國

大秦國者西天諸國之都會大食蕃商所萃之地也其王號麻囉弗以帛織出金字纏頭所坐之物則織以絲罽有城郭居民王所居舍以石灰代瓦多設簾幃四圍開七門置守者各三十人有他國進貢者拜於階祀之

下祝壽而退屋下開地道至禮拜堂一里許王少出惟誦經禮佛遇七日即由地道往禮拜堂拜佛從者五十人國人罕識王面若出遊騎馬打三簷青繖馬頭項皆飾以金玉珠寶遞年大食國王號素丹遣人進貢如國內有警即令大食措置兵甲前來撫定所食之物多飯餅肉不飲酒用金銀器以匙挑之食已即以金盤貯水濯手土產琉璃珊瑚生金花錦縵布紅馬腦真珠天竺國其屬也國有聖水能止風濤若海揚波以琉璃瓶盛

水灑之即止

大食諸國

大食者諸國之總名也有國千餘所知名者特數國耳
有麻離拔國廣州自中冬以後發船乘北風去約四
十日到地名藍里博買蘇木白錫長白藤住至次冬再
乘東北風六十日順風方到此國產乳香龍涎真珠琉
璃犀角象牙珊瑚木香沒藥血竭阿魏蘇合油沒石子
薔薇水等貨皆大食諸國至此博易國王官民皆事天

官豪各以金線挑花帛纏頭搭項以白越諾金字布為衣或衣諸色錦以紅皮為履居五層樓食麵餅肉酪貧者乃食魚蔬地少稻米所產果實甜而不酸以蒲桃為酒以糖煮香藥為思酥酒以蜜和香藥作眉思打華酒暖補有益以金銀為錢巨舶富商皆聚焉哲宗元祐三年十一月大食麻囉拔國遣人入貢即此麻離拔也

有麻嘉國自麻離拔國西去陸行八十餘程乃到此是佛麻霞勿出世之處有佛所居方丈以五色玉結甃成

墻屋每歲遇佛忌辰大食諸國王皆遣人持寶貝金銀
施捨以錦綺蓋其方丈每年諸國前來就方丈禮拜并
他國官豪不拘萬里皆至瞻禮方丈後有佛墓日夜常
見霞光人近不得往往皆合眼走過若人臨命終時取
墓上土塗冑即乘佛力超生云 有白達國係大食諸
國之京師也其國王則佛麻霞勿之子孫也大食諸國
用兵相侵不敢犯其境以故其國富盛王出張阜蓋金
柄其頂有玉獅子背負一大金月耀人目如星遠可見

也城市衢陌居民豪侈多寶物珍段皆食餅肉酥酪少
魚菜米產金銀碾花上等琉璃白越諾布蘇合油國人
皆相尚以好雪布纏頭所謂軟琉璃者國所產也 有

吉慈尼國皆大山圍遶鑿山為城方二百里環以大水
其國有禮拜堂百餘所內一所方十里國人七日一赴

堂禮拜謂之除

或作尉

幟其國產金銀越諾布金絲錦五

色駝毛段碾花琉璃蘇合油無名異摩娑石人食餅肉
乳酪少魚米民多豪富居樓閣有五七層者多畜牧駝

馬地極寒自秋至春雪不消寢近西北故也 有眉路
骨惇國居七重之城自上古用黑光大石疊就每城相
去千步有蕃塔三百餘內一塔高八十丈內有三百六
十房人皆纏頭搭項寒即以色毛段為衣以肉麵為食
以金銀為錢所謂鮫綃薔薇水梔子花摩娑石鵬砂皆
其所產也 有勿廝離國其地多名山秋露既降日出
照之凝如糖霜採而食之清涼甘腴此真甘露也山有
天生樹一歲生粟次歲生沒石子地產火浣有珊瑚

木蘭皮國

大食國西有巨海海之西有國不可勝數大食巨艦所
可至者木蘭皮國爾蓋自大食之陀盤地國發舟正西
涉海一百日而至之一舟容數千人舟中有酒食肆機
杼之屬言舟之大者莫木蘭若也今人謂木蘭舟得非
言其莫大者乎木蘭皮國所產極異麥粒長二寸爪圍
六尺米麥窖地數十年不壞產胡羊高數尺尾大如扇
春剖腹取脂數十斤再縫而活不取則羊以肥死其國

相傳又陸行二百程日晷長三時秋月西風忽起人獸
連就水飲乃生稍遲以渴死

西天諸國

西方諸國大率冠以西天之名凡數百國最著名者王
舍城天竺國中印度蓋佛氏所生故其名重也傳聞其
地之東有黑水淤河大海越之而東則西域吐蕃大理
交趾之境也其地之西有東大食海越之而西則大食
諸國也其地之南有洲名曰細蘭國其海亦曰細蘭海

昔張騫使大夏聞身毒國在大夏東南一千里余聞自大理國至王舍城亦不過四十程案賈耽皇華四達記云自安南通天竺又達摩之來浮海至番禺此海道可通之明驗也

西天南尼華囉國

西天南尼華囉國城有三重其人早晚必浴以鬱金塗身面效佛金色國人多稱婆羅門以為佛真子孫屋壁坐席塗以牛糞家置壇崇三尺三級而升每晨以牛糞

塗焚香獻花供養道通西域西域忽有輕騎來却但閉
門距之數日乏糧自退

東南海上諸雜國

東南海上有沙華公國其人多出大海劫奪得人縛而
賣之閩婆又東南有近佛國多野島蠻賊居之號麻羅
奴商舶飄至其國擒人以巨竹夾而燒食之賊首鑽齒
陷以黃金以人頭為食器其島愈深其賊愈甚又東南
有女人國水常東流數年水一泛漲或流出蓮肉長尺

餘桃核長二尺人得之則以獻於女王昔常有舩舟飄落其國羣女攜以歸數日無不死有一智者夜盜船亡命得去遂傳其事其國女人遇南風盛發裸而感風咸生女也

崑崙層期國

西南海上有崑崙層期國連接大海島常有太鵬飛蔽日移晷有野駱駝大鵬遇則吞之或拾鵬翅截其管堪作水桶又有駱駝鶴身項長六七尺有翼能飛但不高

耳食雜物炎火或燒赤熱銅鐵與之食及產大象牙犀
角又海島多野人身如黑漆拳髮誘以食而擒之動以
千萬賣為蕃奴

波斯國

西南海上波斯國其人肌理甚黑鬚髮皆拳兩手鈴以
金串縵身以青花布無城郭其王早朝以虎皮蒙杙疊
足坐羣下禮拜出則乘軟兜或騎象從者百餘人執劍
呵護食餅肉飯盛以甕器掬而啗之

蜃蠻

以舟為室視水如陸浮生江海者蜃也欽之蜃有三一為漁蜃善舉網垂綸二為蠔蜃善沒海取蠔三為木蜃善伐山取材凡蜃極貧衣皆鷄結得掬米妻子共之夫婦居短蓬之下生子乃猥多一舟不下十子兒自能孩其母以軟布束之背上蕩槳自如兒能匍匐則以長繩繫其腰於繩末繫短木馬兒忽墮水則緣繩汲出之兒學行往來蓬脊殊不驚也能行則已能浮沒蜃舟泊岸

羣兒聚戲沙中冬夏身無一縷真類癩然蜚之浮生似
若浩蕩莫能馴者然亦各有統屬各有界分各有役於
官以是知無逃乎天地之間廣州有蜚一種名曰盧停
善水戰

三伏馱

交趾之南有山曰播流環數百里若大鐵圍不可攀躋
中皆良田唯有一竅可入有種類居之交趾所不得而
臣號曰三伏馱安南屢欲滅之其人守險萬方不可入

三伏馱自言曰縱安南有強兵我自有禾可食蓋謂其不可滅也

徭人

徭人者言其執徭役於中國也靜江府五縣與徭人接境曰興安靈川臨桂義寧古縣徭人聚落不一最强者曰羅曼徭人麻園徭人其餘曰黃沙曰甲石曰嶺屯曰褒江曰贈脚曰黃村曰赤水曰藍思曰巾江曰竦江曰定花曰冷石坑曰白面曰黃意曰大利曰小平曰灘頭

曰丹江曰麋江曰閃江曰把界山谷彌遠徭人彌多盡
隸於義寧縣桑江寨徭人椎髻臨額跣足帶械或袒裸
或鶉結或斑布袍袴或白布巾其酋則青巾紫袍婦人
上衫下裙斑斕勃率惟其上衣斑文極細俗所尚也地
皆高山而所產乃輜重欲運致之不可肩荷則為大囊
貯物以皮為大帶挽之於額而負之於背雖大木石亦
負於背徭人耕山為生以粟豆芋魁充糧其稻田無幾
年豐則安居巢穴一或饑饉則四出擾擾土產杉板滑

石蜜蠟零陵香燕脂木靜江五縣沿邊唯興安義寧縣
官任滿有邊賞

西南夷

西南五姓蕃部曰龍羅方石張自昔許上京入貢龍羅
方石自宜州入境張蕃自邕州入境或三年或四五年
計五姓人徒凡九百六十人所貢羶馬丹砂朝廷支賜
錦衫銀帶與其他費凡二萬四千四百餘緡回答之物
不與焉熙寧八年令五姓蕃五年一進奉納方物於宜

州宜州估時價回答又有西南韋蕃亦五年一進奉宜
州受其方物回答之費凡一千二百餘緡羈縻州亦有
進奉者宜州管下安化三州一鎮舊許三年一上京進
奉額二百九十三人後令納方物於宜州思立寨而親
赴州領賜西南夷大率椎髻跣足或衣斑花布或披氊
而背刀帶弩其髻以白紙縛之云猶為諸葛武侯制服
也武侯之烈遠矣哉

通道外夷

中國通道南蠻必由邕州橫山寨自橫山一程至古天
縣一程至歸樂州一程至唐興州一程至駐殿州一程
至七源州一程至泗城州一程至古那洞一程至龍安
州一程至鳳村山獠渡江一程至上展一程至博文嶺
一程至羅扶一程至自杞之境名曰磨巨又三程至自
杞國自杞四程至古城郡三程至大理國之境名曰善
闡府六程至大理國矣自大理國五程至蒲甘國去西
天竺不遠限以淤泥河不通亦或可通但絕險耳凡三

十二程若欲至羅殿國亦自橫山寨如初行程至七源
州而分道一程至馬樂縣一程至恩化縣一程至羅奪
州一程至圍慕州一程至阿妹蠻一程至硃砂蠻一程
至順唐府二程至羅殿國矣凡十九程若欲至特磨道
亦自橫山一程至上安縣一程至安德州一程至羅博
州一程至陽縣一程至隘岸一程至那郎一程至西寧
州一程至富州一程至羅拱縣一程至歷水鋪一程至
特磨道矣自特磨一程至結也蠻一程至大理界虛一

程至最寧府六程而至大理國矣凡二十程所以謂大理欲以馬至中國而北阻自杞南阻特磨者其道里固相若也聞自杞特磨之間有新路直指橫山不涉二國今馬既歲至亦不必由他道也

航海外夷

今天下沿海州郡自東北而西南其行至欽州止矣沿海州郡類有市舶國家綏懷外夷於泉廣二州置提舉市舶司故凡蕃商急難之欲逃愬者必提舉司也歲十

月提舉司大設蕃商而遣之其來也當夏正之後提舉
司征其商而覆護焉諸蕃國之富盛多寶貨者莫如大
食國其次閩婆國其次三佛齊國其次乃諸國耳三佛
齊者諸國海道往來之要衝也三佛齊之來也正北行
舟歷上下竺與交洋乃至中國之境其欲至廣者入自
屯門欲至泉州者入自甲子門閩婆之來也稍西北行
舟過十二子石而與三佛齊海道合於竺嶼之下大食
國之來也以小舟運而南行至故臨國易大舟而東行

至三佛齊國乃復如三佛齊之入中國其他占城真臘之屬皆近在交趾洋之南遠不及三佛齊國閩婆之半而三佛齊閩婆又不及大食國之半也諸蕃國之入中國一歲可以往返唯大食必二年而後可大抵蕃舶風便而行一日千里一遇朔風為禍不測幸泊於吾境猶有保甲之法苟泊外國則人貨俱沒若夫默伽國勿斯里等國其遠也不知其幾萬里矣

沿邊兵

按此下十二條當另為一門原本脫去標目

祖宗分置將兵廣西得二將焉邊州邕管為上宜次之
欽次之融又次之靜江帥府元屯半將二千五百人又
駐泊兵二千人効用五百人又殿前摧鋒軍五百人又
有雄略忠敢等軍軍容頗盛無事足以鎮撫有事足以
調發邕屯全將五千人以三千人分戍橫山太平永平
古萬四寨及遷隆鎮其二千人留州更戍宜州屯半將
二千五百人乃靜江一將之分屯者高峯帶溪北遐思
立鎮寧諸寨之戍乃多用天河思恩河池三縣之土丁

而宜州在城與夫溪峒都巡檢兵蓋不滿千人欽之澄海與夫管界沿海二巡檢合集不過五百人而如昔之戍出於峒丁抵棹之戍出於土丁融州舊撥靜江府馬軍二百人都巡檢兵亦不過二三百輩祖宗時以廣右事力繇薄而邊防急切故歲賜錢一百一十餘萬緡而諸郡稅賦以之養兵積威宜有餘裕南渡以來歲賜已絕又歲取廣西鹽鈔錢四十萬緡經總制錢數十萬緡歷年滋久故諸郡銷兵以自足爾

土丁戍邊

邕欽與交趾為境自昔二郡土丁雜官軍戍邊邕州土丁戍邊之事未詳欽之抵棹寨以安遠縣土丁百人更戍季一替厥後宜有南丹莫公晟之擾大觀元年始詔宜州土丁依邕欽例戍邊正兵長戍二百人土丁更戍三百人以天河思恩河池三縣土丁父子全不分番戍守其間河池一縣最近高峯與南丹對境要害地也而河池一縣土丁正可分為兩番一季一替乃於腹裏之

宜山忻城二縣三丁抽一分為三番月一替是則宜之
土丁其役更重於邕欽也宜之守臣屢請於朝乞差次
邊柳象賓橫州土丁與宜之土丁更戌以紓極邊之民
不報而宜之戌至今不已

峒丁戌邊

羈縻州之民謂之峒丁強武可用溪峒之酋以為兵衛
謂之田子甲官欲用其一民不可得也唯欽州七峒峒
丁為官戌邊蓋七峒權力弱於邕管故聽命也舊制欽

峒置巡防使臣一名以官軍百人戍如昔峒以備交趾
因官軍虐之峒酋乞不用官軍願自以峒丁更戍以故
欽州猶有峒丁之戍

田子甲

邕州溪峒之民無不習戰刀弩鎗牌用之頗精峒民事
雙殺是以人習於戰鬪謂之田子甲言耕其田而為之
甲士也又朝廷馬政正在其地所謂良馬彼多得之峒
豪頗習驍騎峒官出入前驅千人後騎數十整整不亂

亦謂之馬前排靖康之變峒兵有勤王者遺老猶能言之曰峒民素儉勤王之役日得券錢積而不用比歸人有二三百緡之積至今以為美談嘗有官員自儂峒借人夫至欽所從數人道間麋興於前能合而取之鳶飛於天能仰而落之一夕逆旅劫盜人有懼色唯峒人整暇以待盜不敢前昔漢高祖用板楯蠻以取關中武王伐商亦用微盧彭濮人正使今日有疆場之事而用之當必有功

峒丁

邕州左右江提舉峒丁與夫經略司買馬幹官兼提舉
皆此職也熙寧中係籍峒丁四萬餘人今其籍不可攷
矣官名提舉實不得管一丁而生殺予奪盡出其酋欽
州峒丁雖不如邕管之已甚所以奉其酋者亦類此嘗
聞道家有言人罪重者謫為邊民罔有藝極峒丁日各
以職供水陸之產為之力作終歲而不得一飽為之效
死戰爭而復加科斂一有微過遣所親羣斬之上流而

身於下流閱其尸也日曛酒醉酣杖劍散步峒丁避不及者手刃焉類以此為服人之威何其酷也

寨丁

環羈縻溪峒置寨以臨之皆吾民也謂之寨丁靜江府有桑江寨融州有融州寨武陽寨與潯江文材茶溪臨溪四堡宜州有高峰寨帶溪寨北遐寨思立寨鎮寧寨邕州有橫山寨溫潤寨太平寨永平寨古萬寨遷隆鎮欽州有如昔寨抵棹寨瓊州有寶西寨西峯寨延德寨

萬安軍有萬全寨吉陽軍有通遠寨凡諸寨之戍或用
官軍或峒丁或寨丁寨官或巡防使臣或都監或知寨
或一寨有長貳官屬是皆係乎寨之大小也諸寨行事
動關化外法制不得不少寬威權不得不稍重夫諸寨
迥居於諸峒之中寨丁戍戍不下百人彼寨之境山谷
阻深異材生之今邊境晏然亦未免有採山之役

土丁保丁

自儂智高平朝廷聯一路之民以為兵戶滿五丁者以

一為土丁二丁者以一為保丁熙寧六年詔依河北義勇例修立條制如禁軍置都虞候以下六階以隸之因其民之資序而為之階級專屬經略司調發其保丁則隸於州縣而以保正統之八年廣西諸司乞以土丁教閱今保丁亦教閱也每歲農隙會土保丁越州若縣教以坐作進退號令旗鼓之法一季而罷立法之意蓋以廣民彫弱人無固志若素教其民一旦有警則百萬之師可以遽集今乃州縣私役於教閱之餘寢失初意然

有不可不役者廣西城壁皆以土為周覆以屋一歲不
葺多致腐壓為郡將者先盡教閱之道以體立法之意
乃約城屋當用之工分部竭作不容私役旬月集事即
日散之民亦樂從而不以為勞矣

効用

廣右効用蓋諸郡山川廣莫生齒不蕃強弱不侔又四
方之姦民萃焉於是諸郡所在假強武之民以効用名
之豪民亦借官為重自王宣凌鐵謝實為變賴効用立

功厥後經略司乃置効用五百人於靜江凡強盜貸死逃卒亡命與其強武願從之民咸集焉善接短刃以威賊隱然形勢有足取者靜江効用自成一軍若乃諸郡効用散在民間猶存而不廢

土宣

廣西郡兵卒歲有押馬綱賞累至受宣押馬往來販賣至多貲亦有累賞補官者厥後朝廷減賞只許轉至十將不許受宣於是邊州守臣便宜出帖補副都虞候謂

之土宣其間亦有以私恩不令陟階級而補副都虞候者雖不請厚祿而為排軍矣

五民

欽民有五種一曰土人自昔駱越種類也居於村落容貌鄙野以唇舌雜為音聲殊不可曉謂之婁語二曰北人語言平易而雜以南音本西北流民自五代之亂占籍於欽者也三曰俚人史稱俚獠者是也此種自蠻峒出居專事妖怪若禽獸然語音尤不可曉四曰射耕人

本福建人射地而耕也子孫盡閩音五曰蜑人以舟為室浮海而生語似福廣雜以廣東西之音蜑別有記

惰農

深廣曠土彌望田家所耕百之一爾必水泉冬夏常注之地然後為田苟膚寸高仰皆棄而不顧其耕也僅取破塊不復深易乃就田點種更不移秧既種之後旱不求水澇不䟽決既無糞壤又不耔耘一任於天既穫則束手坐食以卒歲其妻乃負販以贍之已則抱子嬉遊

慵惰莫甚焉彼廣人皆半羸長病一日力作明日必病或至死耳

僧道

南中州縣有寺觀而無僧道人貧不能得度牒有祠部牒者無幾餘皆童行以供應聖節為名判公憑於州縣權行剃髮戴冠遂為真僧道如出公據其說謂被盜遭火失去度牒官為給據為憑遂以剃戴

